

I214.8/5

docsriver 文川网
古籍书城
入驻商家
在文川网搜索古籍书城 获取更多电子书


徐朔方 笺校

湯顯祖詩文集

下


上海古籍出版社

首都师范大学图书馆



20878919

878919



湯顯祖詩文集卷十九 玉茗堂詩之十四

詩二百十首 一五九八——一六一六，四十九歲——六十七歲。作於棄官家居後，年月不詳。

華西四絕寄王道服岳伯

百二河關紫氣重，垂闌躡蹬度蒼龍。無緣便瞰明星出，露洗笙簫雲外峯。
吳氣金河靜鬱盤，峯中人語白雲端。初窺玉井樓頭坐，十丈蓮花掌上看。
西峯瀑濺雨廉纖，星宿窗搖上玉簾。落日滿山松色動，倒吹蒼嶺作龍髯。
西望白雲乘帝鄉，一時忘却車箱。蓮花別起清寒色，玉女頭盆下玉漿。

【箋】

〔王道服岳伯〕名民順，金谿人。時任陝西參政。見撫州府志卷五十一。

【評】

沈際飛評云：『取神詠景，渾然唐韻。』

得信州高壽丞寄元舒哭兒書，是時元舒亡久矣二首

去來吳越幾經過，相國名園春恨多。便作再遊君在否？可憐蒲稗浴鷗波。

君哭孩兒解索環，阿舒都不在人間。舊作寄來堪掩涕，十年心事到常山。

唱二夢

半學儂歌小梵天，宜伶相伴酒中禪。纏頭不用通明錦，一夜紅氍四百錢。

【箋】

〔二夢〕所作南柯記、邯鄲記二傳奇。

和張師相二月桃花嶺看雪

天垂六出駐仙車，春色同雲半紫霞。醉問桃花定紅雪，仙家原重碧桃花。

【箋】

〔桃花嶺〕在江西新建。

口占奉期建安三月三二首

洞浦吹簫興卽留，幾攀高駕動南州。禁春羽爵應無算，但借賢王曲水流。
排比新聲接舊驩，重門初燕語春寒。心知日暮能留客，明月西園是建安。

【箋】

docsriver 文川网
入驻商家 古籍书城

在文川网搜索古籍书城 获取更多电子书

〔建安〕寧獻王之後。

玉蘭花開和張師相

長廊客散雨微晴，素影高寒月下行。似是相公憐曲廡，木蘭花慢一聲聲。

【評】

沈際飛云：『隨題捏就，何其便也。』

袁侯喜作佛事，廣壽寺集僧展藏甚盛，寄問浮梁水月

五色袈裟飯一時，虛堂雅步稱容儀。獨持海月歸山去，正是燈油猛盛時。

【箋】

〔袁侯〕名世振，萬曆二十七至三十二年任臨川知縣。

〔廣壽寺〕在臨川東城。

廣壽寺僧多土田眷屬，嗔疾客僧乞食展藏二首

乞食緇經好勝因，有情相續更何人？心知破鉢難留住，爲有從前獅子身。
名句文身總不多，空拋盞飯向維那。諸天聽着成何事，流涕相看迦葉波。

作紫欄戲衣二首

試剪輕綃作舞衣，也教煩豔到寒微。
當歌正值春殘醉，醉後魂隨烟月飛。
無分更衣金紫羅，伎人穿趁踏朝歌。
俳場得似官場好，燈下紅香不較多。

看接花子示兒

度臘占春老囊駝，一年花事竟如何？
陶家只合栽楊柳，玉樹芝蘭自不多。

先友吉水劉兌陽兄子晉卿以空函遠寄，却贈二首

天上人爲泉下期，悲思公子卽能詩。
兩家門戶堪如此，不見長安書記時。
遠道空書意不任，昔人詩共此時心。
便作親朋無一字，足教之子慎千金。

【箋】

〔劉兌陽〕名應秋。湯顯祖曾以女子許字應秋子晉卿。

讀錦帆集懷卓老

世事玲瓏說不周，慧心人遠碧湘流。
都將舌上青蓮子，摘與公安袁六休。

【箋】

〔錦帆集〕公安袁宏道著。六休，或為宏道別號。

〔卓老〕李贄。袁宏道會師事之。萬曆三十年於北京獄中自殺。

【評】

沈際飛評第二句云：『句妙。』

送吳龍游徙陽春長，乞藤障子四首

龍丘山水帶風塵，未暇絃歌學愛人。直置梅花江嶺外，恩光常許奏陽春。
 倦遊遊處亦風光，棊局丹書遶印床。莫為炎荒心便熱，春州南畔正高涼。
 海珠江與七星連，夜半山川好扣舷。解是吳郎舊風色，一杯相對石門泉。
 折腰君喜得同鄉，仙嶠題書歲月長。定有高雲藤障子，先分海色到柴桑。

【箋】

〔吳龍游〕名應試。臨川人。萬曆二十九年會試副榜第一。歷任虹縣教諭，龍游、陽春知縣。見撫州府志卷五

十一。

聽于采唱牡丹

不肯蠻歌逐隊行，獨身移向恨離情。來時動唱盈盈曲，年少那堪數死生。

江雪圖送李篆史還盱二首

落日河橋歸雁呼，淥尊清淺映麻姑。還邀曉月冰壺句，來看寒江雪棹圖。
去別章門夜泊船，雪窗高枕對窮年。朝看雪意成霞色，知是圖書氣燭天。

掃除瓦礫成堆，偶望達官家二首

社燕秋歸掃舊窠，倒翻門戶見天河。東家樓上西家庫，得似吾家瓦礫多。
偶然開掃到池林，瓦礫堆高一丈深。若遇仙才能作使，此中真可築黃金。

送篆史張藜叟九江二首

西江歲月逢殘雪，東壁圖書老客星。半箸藜羹禁大嚼，就中知有五侯鯖。
瀑布齋頭坐欲曛，暮江晴雪見峯雲。雙鈎若向屏風底，爲帶芝泥九疊文。

送琴僧還閩，奉懷世伯李百鶴先生，并懷顏曼叟

水有懷仙山有靈，琴僧須向足閒亭。桃陵左相能相見，百鶴老人時一聽。

【箋】

〔世伯李百鶴先生〕同年進士、江西按察使李開芳之父。福建永春人。見玉茗堂賦之五懷恩念賦。

招青林僧二首

到處青林是作家，不萌枝上又開花。明朝得問文殊病，打碎琉璃浪吃茶。
春到青林幾樹香，華嚴海畔衆齋糧。不應下會相瞞得，白牯狸奴在一堂。

送曇歆度嶺二首

雷浪山頭下雪溪，六朝僧度楚雲西。無緣更逐齋時去，不信人間飯色齊。
昨日春分酒一卮，明朝僧飯乞從誰？參差欲到梅關路，正是黃梅雨渴時。

病起懷吳璽郎疎山二首

風雨樓頭病欲休，獨行池上柳絲稠。相思三月桃花水，欲下真人蓮葉舟。
沙井門庭靜不紛，百年多病更何云？獨憐一片袈裟地，終日樓頭望白雲。

【箋】

〔吳璽郎〕或是仁度。金谿人。明史卷二八三有傳。

春興懷學卿二首

章門秋色老菰蒲，歸去春風又阿奴。
解得鵝兒黃似酒，亂催雙槳向鵝湖。
何來鶯燕已春分，公子乘春醉碧雲。
起踏鵝湖唱金縷，嫩黃衫映水皴文。

【箋】

〔學卿〕費元祿字。鉛山人。見列朝詩集小傳丁集中。

送客麻姑便過廬嶽飯僧二首

陽湖歸雁雪紛紛，映漾峯頭幾疊雲。
不向麻源問清淺，龍沙高已半匡君。
王孫高興逐年新，草色鄉心一半春。
堂上白鴉飛欲盡，鉢中香飯餽誰人？

【評】

沈際飛評第二首第一句云：「俚。」

寄問清流王相如二首

雪銷晴瀑下衡廬，賦寫清流煙月餘。
便不遊梁先客楚，氣吞雲夢亦相如。
江城南浦繫舟頻，笑隔桃花又一春。
但向清流作漁父，湘沅難是獨醒人。

元夕洪沙公子遠致高燈却謝二首

編珠洗翠燄樓臺，細雨和風酒一杯。巡簷忽睇開雲月，清夜同誰賞笑來？
八閩傳豔見高華，三市煙宵此一家。玉宇滿堂風帶起，翩翩公子自洪沙。

【箋】

〔洪沙公子〕疑是故相張位之子。

〔三市〕在臨川城內。

送王孔憲越遊懷中郎二首

赤日行天豈去時，山陰殘雪夜何之？飄花漱石寒如許，曾見袁家五洩詩。
石門流火氣霏微，月露孤舟小葛衣。直過嚴陵問湘楚，客星秋與亂帆飛。

【箋】

〔中郎〕袁宏道字。萬曆二十五年辭吳縣知縣，遊浙江一帶。五洩，在浙江諸暨。中郎作有遊記及紀遊詩。

答江陵張維時四首

嘆沼魚不樂如塵趣累禪

失却龍門夜雨醒，旱池噓沫翳微萍。無因說與魚天子，只授金光一分經。

楚江采蓮

蓮心獨唱采蓮歌，葉裏菰糧衣敗荷。何似醉遊沙市裏，琵琶相共鱖魚多。

江鄉聞雁

蘆葦蒼涼自一時，彌天繒繳竟何施？洞庭彭渚春波闊，消息傳君雁字詩。

噍五交，哀二禪，送客自嘲

送客無端祇自嘲，楚江烟雨寄衡茅。達公卓老尋常事，生死無交勝絕交。

偶誦

花竹臨池散曉光，偶拈諸品坐繩床。長年得見波斯水，靜日能生般若香。

聞拾之渡瓊，寄胡憲伯瑞芝二首

沓磊高臺向若登，玉芝烟雨去時曾。秋風海角書囊裏，爲賦炎州五色藤。

自然瓊樹不妨瓊，能使炎風海外清。但得檳榔一千口，與君相對臥紅笙。

【箋】

〔拾之〕姓吳，號玉雲生，顯祖同里友人。

〔胡憲伯瑞芝〕名桂芳，金谿人。萬曆二十九年正月任廣東按察使，三十三年十二月加廣東左布政使，三十五

年九月巡撫貴州。撫州府志有傳。

〔沓磊〕在廣東徐聞縣南。

臨章樓聞越舸且別悵然二首

臨章樓畔唱歌頻，亂颯花枝記飲巡。定去揚州須說與，相憐還是故鄉人。
亂帆秋影半江樓，燕語滄涼傍客舟。便去揚州且明日，故鄉今夜有人留。

金精洞 在寧都

悠悠世事幾千年，鳳舞鸞歌此洞天。夜半紫雲飛作雨，金精石上漱瓊泉。

雲卿湖上待萬余二生不至

夢裏吟詩醉寫真，秋光湖上月粼粼。無因嚼得青蓮子，爲覓香雲館內人。

晏蜚卿東還并問張賓王二首

偶談黃鶴事多奇，七夕迷樓獨詠詩。
頭白未銷吳楚氣，與君殘醉月斜時。
爾師南國舊知名，遲暮東歸弟子情。
積雪半天迴雁影，葫蘆河上見蜚卿。

朱子得太守索顏撫州二姑壇帖

靈姑簫發久凌虛，千歲顏公小字書。
得似灌園真跡在，金梭韓馬欲何如？

【箋】

〔朱子得〕名期至，湖廣蘄水人，曾任懷慶知府。見蘄水縣志卷九。

重過用晦王孫斗西春院作

求仙愛戴竹皮冠，北斗西飛草樹漫。
惟有殘叢舊詩卷，銅盤收淚月清寒。

【箋】

〔用晦〕皇族朱多燿字。續五子之一。見列朝詩集小傳閩集。

諷瀑泉王孫四遊詩

好詩清淺世人留，廬嶽歸來卽倦遊。石架題名烟月裏，海風吹盡瀑泉秋。

沉角寄宗良王孫。王孫肢節並廢，而韻思轉清

好逐王孫桂苑風，水盤烟燼博山紅。由來一葉天香傳，總在枯心斷節中。

【箋】

〔宗良〕皇族朱多燬字。

偶作

兵風鶴盡華亭夜，彩筆鸚銷漢水春。天道到來那可說，無名人殺有名人。

【箋】

或爲萬曆三十、三十一年李贄、達觀先後被害作。

小小

小小詞場得浪名，白頭文字總忘情。若非河嶽驅排盡，定是烟花撥振成。

送黃醫歸麻姑二首

踏海談天興不無，白頭心在片雲孤。
吁翁眼裏三回別，別卽教收彈鵲珠。
朝采三花夜采真，藥爐吁母憶精神。
欲清將淺東瀛水，長照高空黃鶴人。

口號付小葛送山子廣陵三首

青來水榭三層出，山子吳歛一部遊。
爲記臨川荀伯子，尋常兩事足千秋。
塘上蒲生新酒香，水嬉風信下維揚。
山公醉興同山子，愛月時時問葛疆。
烟月揚州一過家，五峯春作綵雲遮。
年來酒盞拋除得，唱盡江南白葛花。

【箋】

〔山子〕謝廷讚號。金谿人。罷官僑居揚州。

〔五峯〕卽青雲、逍遙、桐林、香楠、天慶，在臨川城內。

【校】

〔五峯春作綵雲遮〕綵，沈際飛本作海。

章門諸友雪中來問業，一宿便還二首

一絲香餌不曾開，便作鳴舷鼓浪回。
不爲臨川通釣術，可能辛苦雪中來。
斷臂都無世上情，少林人自雪中行。
文章薄伎何須此？亦有前程一死生。

【箋】

第二首另題『南州門人雪中來問業贈之』，重出，文字全同，惟第一句『都』作『應』。今略去。

城南泣李孝廉東宿

齋閣湖頭坐數移，十年相憶舊題詩。
頻來淚滴寒塘裏，風動殘荷送我時。

江樓看別者

落花初起舵樓風，彩扇熒熒拜孟公。
人去碧簾歸燕老，流蘇浮動月明中。

長至簞葛送夢得東還口號二首

夜插梅尊凍飲頻，河梁飛雁感情親。
清鋪一簞琉璃色，爲照王門冰雪人。
年少相看耆舊稀，新聲纔和忽言歸。
蕭蕭雪意清如許，日暮河橋贈葛衣。

【校】

〔爲照王門冰雪人〕王，沈本作黃。

逢左拱之章門卽贈二首

docsriver 文川网
入驻商家 古籍书城

在文川网搜索古籍书城 获取更多电子书

秋水殘霞相見親，曉風留得使車塵。
何當闕下優游客，來問江邊憔悴人。
宅裏難尋江上逢，江中雲起暮帆風。
披榛夜半吟招隱，似賦吳都左太冲。

李篆史索新婚詩小謔

朱珪不娶何孤潔，李子催妝強索詩。
向後勒成雙鳳紐，臂花偷押睡紅脂。

內嘆

曾學宮妝報粉衙，遠隨才士適天涯。
無緣更說趨朝事，白玉河頭夢落花。

見故時書畫狼藉惜之

牡丹賦作官廚鎮，蕉雪圖支漆竹門。
自是一時珍重意，落花依草更何論。

滕王閣看王有信演牡丹亭二首

韻若笙簫氣若絲，牡丹魂夢去來時。
河移客散江波起，不解銷魂不遣知。
樺燭烟銷泣絳紗，清微苦調脆殘霞。
愁來一座更衣起，江樹沉沉天漢斜。

桂林筆工復之皖，寄謝阮堅之五首

是物臨川祇衆諸，阮郎教作趣何殊。獨憐內史臨池處，未是江淹五色初。
落穉阿那意態慵，陣圖千里付良工。知君殺盡青鏤管，起向蘭臺篆北宮。
下士所無空寸心，幽蘭清水費沉吟。南來一抱蒼琅色，無限江風起竹林。
中山休作越吟聲，天柱峯頭是筆精。不敢秋毫忘江左，與君傾出自然情。
筆毫含潤向江波，匠手來歸益惠多。似我只臨襄晉帖，留君堪發盛唐歌。

玉蘭軒送喻叔虞薄遊嶺南四首

世有文章不逐貧，遠遊須是好精神。風光嶺外從誰說？破鉢巖頭第一人。
烟月留人自一時，孤舟南浦送行遲。關南十月梅花雪，來雁峯前寄一枝。
兄弟能文獨可憐，玉蘭清瘦語留連。經過五莞知炎熱，歸趁扶搖六月前。
十年相負海人期，淚與裁綃一賦詩。君去未須頻道別，浮羅堪有夢來時。

【箋】

〔喻叔虞〕名應益，江西新建人。能詩。見南昌府志卷四十四。

浙中具區赤水茂吳漢城一時沮落，悲之

雨夜恆多處士星，一時江海淚熒熒。

溫王郅庾何須死，似少興公著作銘。

【箋】

具區，馮夢禎，約萬曆三十四年卒；赤水，屠隆，三十三年卒。餘待考。

聞拾之遠信慘然二首

吳江此信不須傳，祇作悠悠在一天。無限白頭歌笑裏，新詞還得個人憐。
延陵公子最聰明，婚嫁年來學遠行。折莫吳歌遣惆悵，斷橋衰柳別時情。

越舸以吳伶來，期之元夕，漫成一首

人日期君君有人，石床清泚注宜春。今宵又踏春陽雪，解傍吳歛記燭巡。
白頭情事故鄉留，殘雪春燈宜夜遊。處處吹簫有明月，相看何必在揚州。

王孫家踏歌偶同黃太次，時粵姬初唱夜難禁之曲四首

珊瑚海上玉如林，豫章門前風露深。動是醉眠江月曉，不應傳唱夜難禁。

西山雲氣晚來多，偶爾相逢人踏歌。俄珂大編載卿去，如此秋光愁奈何。
不須重上泛湖船，碧玉王家小洞天。上客何來看歌舞，暮妝微雨最宜憐。
高堂留客正黃昏，疊鼓初飛雲出門。但是看人隨喝采，支分不許妬王孫。

【箋】

〔黃太次〕名立言，江西廣昌人。官至福建鹽運使。萬曆十九年舉人。建昌府志卷八有傳。

寶應寺故址

內史緡經魯國書，寶雲初地出浮圖。不知世上相輪火，燒過茶門一字無。

【箋】

〔寶應寺〕在臨川，內有謝靈運緡經臺。湯顯祖時已改建縣學。

【校】

〔燒過茶門一字無〕茶，撫州府志作茶。

聞江山何曉御醫使琉球回，喜寄

千里江山一舉杯，舊游無計與徘徊。焉知老去何東白，又向扶桑看日回。

【箋】

〔何曉〕字東白，江山人。湯顯祖爲遂昌知縣時，何曉在縣行醫。見玉茗堂詩平昌送何東白歸江山序。

傷歌者

聰明許細自朝昏，慢舞凝歌向莫論。死去一春傳不死，花神留玩牡丹魂。

畫牆爲風雨所晦作

巽牆初立彩雲新，風雨從天洗角鱗。門戶十年斑剝盡，不妨人笑癩麒麟。

涂石卿

不住環中雲水蹤，十年衰病此相逢。談玄未覺虛煩淨，豈有丹砂治懊懣。

來任卿去官歸蕭山，愛元人九歌圖，爲作

去意蕭然此大夫，剡中谿谷世言殊。傷心漁父臨湘譜，一似英皇泣舜圖。

【箋】

〔來任卿〕名三聘，曾任江西右布政使。去官歸蕭山，當在萬曆三十七年之後。參看玉茗堂賦高致賦。

梳洗作

白髮新梳對曉霞，合歡紗帽斲裁斜。
堪拋繡篋宜男粉，還藉香簪瘦客花。

【評】

沈際飛評末句云：『精工。』

題箋

檻竹臨塘風月鮮，圖花詠鳥送殘年。
桓玄偽事俱塵土，猶藉風流五色箋。

【校】

沈本題目作題箋作。

送客謁梅克生軍府

節鎮曾同京洛塵，醉拈鸚鵡漢陽春。
分麾上黨男兒事，莫買釵頭問婦人。

題達公書跡

永欣寺裏升堂罷，蕉葉林間立塚初。
認到達公奇險處，劍頭釵脚幾踟蹰。

【箋】

或作於萬曆三十一年達觀卒後。

送日者謁溫公純

交初紫氣欲如何？擊殺刑冲世局多。要得郎星依帝座，莫教箕口向天河。

【箋】

〔溫公純〕萬曆二十九年湯顯祖罷職閒住，時溫純爲都御史。明史卷二一〇有傳。

爲屠長卿有贈

望若朝雲見若神，一時含笑一時嗔。不應至死緣消渴，放誕風流是可人。

見沈几軒師題詩二首

幾度秋光扇未塵，玉門開篋憶清真。不應南浦歌風客，來作西州痛哭人。
摺疊裁雲見沈公，扶搖偏愛嶺南風。雙悲太史拋年少，獨幸門生作老翁。

【箋】

〔沈几軒〕名自邠，秀水人。萬曆十一年以翰林檢討任春試房考。見玉茗堂賦之四酬心賦序。

閒雲樓五日二首

坐隱湖簾觸獸環，一彈一說恨關山。今宵一片蕤賓鐵，跳出平池烟月間。
粗參絳帳與橫經，却許鏗鏘到後庭。爲道曲名燈下見，唱來還是隔簾聽。

【箋】

〔閒雲樓〕在南昌章江門外。故相張位別墅。

上藍寺後老君堂小坐

突兀精藍禪意微，客塵朝暮繞僧衣。何得昊天依老子，靜念樓中雲氣飛。

右武送西山茗飲

春山雲霧剪新芽，活水旋炊紺碧花。不似劉郎因病酒，菊釐纔換六班茶。

【箋】

〔西山〕在江西新建。

示李微明

少年豪氣幾年成？斷酒辭家向此行。夜半梅花春雪里，小窗燈火讀書聲。

【校】

沈本題目作示李太虛。或是同一人。

送章伯昭歸竟陵并懷本寧先生二首

年少名家似孝標，蘭臺風起去人遙。能來江漢三千里，時有秋思過雁橋。
玉茗池頭芳樹新，將歸郢客奏陽春。竟陵大有西江水，爲寄相思雲杜人。

【箋】

〔本寧先生〕李維楨字，明史卷二八八有傳。竟陵、雲杜都指李之故鄉京山。

【校】

〔送章伯昭歸竟陵〕竟，原本作景，當改。

慟世

偶然彈劍一高歌，牆上當趨可奈何。便作羽毛天外去，虎兄鷹弟亦無多。

偶齋答客

蓮社珠燈一佛開，意中空色與徘徊。分桃擲果都無分，何賴今朝懺悔來。

徐觀察自云得祕術

墨老都無却老方，上林妖豔亦尋常。君今更說妝臺記，猛取鷄皮作鳳凰。

喜賀閻伯成進士

少年新領帝鄉春，乃父中書一俊人。家世逃禪美衣袂，不煩人贈白綸巾。

【箋】

〔賀閻伯〕或是南京賀知忍之子。

有唱人頗爲客苦惱，嘲之

村務何須擲李娃？當時傳唱一枝花。居間縱有多情客，誰解交搥到狹邪？

卜兆作二首

偶興隨山去撼龍，涉江烟雨翠重重。無緣便作終焉計，爲向靈丘第一峯。
強不尋山奈老何，靈峯雖好夜泉多。重來莫問湘騷客，長是深林帶女蘿。

【評】

沈際飛評第二首末句云：「托寄不凡。」

送豐城陸郡博廉州二首

雷陽曾此佇征槎，城月郵前溪路斜。尚有湖頭雙雁至，數程猶未到天涯。
內史池邊洗墨還，春風重過太廉山。君看海上珠池氣，猶似徘徊牛斗間。

【評】

沈際飛評第一首結句云：「氣厚之句。」

送葉仁長還建安二首

年少文章出富沙，歸來仍是舊名家。傾筐試酌臨川酒，何似甌城第一茶。
炎州桂樹已成叢，年少還家氣鬱葱。今夜與君文字飲，繞堂銀燭荔枝紅。

送古松造像往奉鷄足山二首

好相熒熒金紫檀，經行萬里得輕安。到時不用趺蓮座，坐向點蒼如玉盤。
如來行處要人行，二十八傳迦葉情。但過五華風日好，樹頭常作念珠聲。

喜李乃始太史蜀歸過飲，見示西征二作，用和并懷曹能始九江

匡廬晴色下巫陽，湖水相思日月長。墨妙近新逢二始，蜀箋開處錦明光。

【箋】

〔李乃始〕名光元，字麟初。進賢人。萬曆三十五年進士。授編修，冊封蜀藩，取道歸省。見南昌府志卷四十一及題名碑錄。

【校】

〔示西征二作〕沈本二作三。

卽事送錢晉明遊西粵歸長興二首

梅嶺歸來三月三，春衣連霧洗昭潭。還家恰盡相思苦，少婦迎門說二蠶。
玉茗離觴又一年，越江初過雨茶烟。亦知天繪亭中月，長照溪頭罨畫船。

謔客二首

巧笑樓頭一片雲，太平橋外酒初醺。何如落夜峨珂去，莫遣匆匆遇使君。
盱水如膏粉豔新，清寒能遇素心人。閑時意態夢中語，才見眞眞畫未眞。

docsriver 文川网
入驻商家 古籍书城

在文川网搜索古籍书城 获取更多电子书

【評】

沈際飛評第二首第二句云：『說得有品。』

玉茗堂校定册府元龜藏本，偶觸浩嘆

已拚册府隨塵篋，自分元龜食蠹魚。獨憶童烏分校日，玄亭荒草十年餘。

【箋】

〔童烏〕指長子士蘧。

【評】

沈際飛云：『册府苦無善本。若士所校定何在？予將寤寐求之。有出而公之者，其人亦千古也。』

送洪雲林入都暫過毘陵四首

雲林幾宿恣奇遊，夢入吳江烟雨秋。爛醉芙蓉池上別，明年聞雁在何樓？

客路傷多年思侵，來家不得住雲林。秋光且作毘陵醉，一指堂前霄漢心。

自分濕灰何處然？偏多幾歲問胡顛。知君得相堅肥客，還傍愚公瘦影憐。

語舊談新心自傷！霞城秋色去遼陽。還家又是三年後，客路何如鄉夢長。

【箋】

鄉愚公有瘦影樹。

〔鄒愚公〕名彥吉，毘陵（常州）人。曾爲湯顯祖作傳記。

〔校〕

題目洪雲林，沈本云：洪一本作張。

第三首原註『鄒愚公有瘦影榭』七字，從沈際飛本增入。

〔評〕

沈際飛評第二首末句云：『轟然。』又評第四首末句云：『唐句。』

送商孟和梅二首

畫扇留詩得半年，碧雲秋近草堂前。填河雀起書須寄，見子乘槎南斗邊。
曾見春箋小韻清，曲中傳道最多情。西江大有多情客，不得江東一步行。

〔箋〕

〔商孟和梅〕列朝詩集小傳丁集下云，商家梅，字孟和。閩縣人。萬曆末年遊金陵，與鍾惺交好。卒於崇禎十年。

送郡丞雷實先還郢并寄舊丞聶慶遠四首

聽鶯出谷意能無，作賦新知楚大夫。正與登高容易別，可憐春色在江湖。